

Nagin cumbat per posts en suprastanza da la Lia

L'emna proxima elegian u reelegian ils delegads il gremi strategic

DA CLAUDIA CADRUVI / ANR

■ **Roman Pfister candidescha per la suprastanza da la Lia Rumantscha. Autras candidaturas n'èn fin uss betg en vista per il post da Jon Carl Tall che remetta ses uffizi. Era Johannes Flury na para sco parsura da l'uniun tetgala betg dad esser contestà. Ils delegads la Lia sa radunan la sonda da l'emna proxima a Glion. Sin la glista da tractandas stattan il giubileum da 100 onns Lia e las medias rumantschas. Plinavant elegian u reelegian ils delegads la suprastanza. Il president Flury sa metta puspè a disposiziun ed er ils represchentants da las uniuns regiunalas – *Gion Capeder, Angela Jann e Donat Nay* – vulan cuntinuar la lavur en suprastanza. Liber vegn sulet il post da *Jon Carl Tall*.**

URB less puspè

Tall ha presidià blers onns l'Uniun dals Rumantschs da la Bassa (URB) ed è ultra da quai stà en la suprastanza da la Lia. La primavaira passada ha el dà giu il presidi e sco successur è vegnì elegì *Roman Pfister*. Gia a chaschun da quest'elecziun ha Pfister ditg ch'el avessia interess da candidar per la suprastanza da la Lia. En l'ultim fegljet da l'URB ha el confermà questas intenziuns e scriva: «Suenter intensivass discussiuns sun jau ma decidi da candidar per il post da supstant. Jau astg menziunar ch'jau sun dapi decennis medemamain era commember da la Surselva Romantscha ed anteriuramain da la Renania. Suent'ina represchentaziun d'origin engiadinais cun Jon Carl Tall vegniss cun mia candidatura uss er in'otra regiun respectada, la Surselva.» Pfister sutlingiescha l'impurtanza da la diaspora e ch'ì dovria ina persuna da la Bassa en la suprastanza da la Lia.



Gremi strategic da la Lia: Il president Johannes Flury ed ils supstantants Jon Carl Tall, Gion Capeder, Donat Nay ed Angela Jann. MAD

GiuRu n'ha nagin

«Sch'ì candidat giuven stess a disposiziun per la suprastanza da la Lia elegessan nus segir lez», di *Wolf Candrian*, president da la Gjuventetgna Rumantscha (GiuRu). «Nus avain dumandà en nossa suprastanza sch'ìnsatgi avess interess.» Ma la finala na saja nagin s'annunzià. Gia dapi passa diesch onns n'ha la gjuventetgna rumantscha g'ì nagin pli en la suprastanza da l'uniun tetgala. «I fess schon flot sch'ìns avess puspè ina giada insatgi ch'ì avess tschaffen», manegia Candrian. Da l'otra vart haja quai er avantatgs d'avair ina tscherta distanza e da betg esser involvè en il gremi strategic. Uschia ha-

jan ins sco uniun da la gjuventetgna daplì libertads.

UdG porta Angela Jann

Angela Jann, la represchentanta da l'Uniun dals Grischs (UdG), sesa dapi in onn en la suprastanza da la Lia. Ella veglia cuntinuar sia lavur, di *Hermann Thom*, president da l'UdG: «Nus na fasschain naginas autras propostas. Da nossa vart èsi quiet. Era cuntrapropostas per il presidi na sustegnain nus betg. Cun la Lia Rumantscha avain nus ina buna relaziun e contacts directs e sincers.» Ils ultims onns sajan s'establids era buns contacts cun las autras uniuns affiliadas. I ha-

ja dà temps che las relaziuns n'erian betg uschè optimalas. «Quels temps èn uss passads», di Thom. «Uss van ins ina via dal dialog e tschertga soluziuns.»

URGC ha nominà Gion Capeder

L'Uniun rumantscha Grischun central (URGC) ha gia nominà la primavaira passada Gion Capeder per in'ulteriura perioda d'uffizi. «Jau chatt interessant da m'occupar cun strategias da fatschentas», di Capeder. La politica da linguatg stettia a cor ad el. Gia sco giuven saja el stà collià cun l'Uniun rumantscha da Surmeir. Sin la dumonda tge sfidas che spetgian la suprastanza en la proxima perio-

da d'uffizi manegia Capeder: «Las sfidas na vegnan betg a sa midar. Las medias rumantschas restan era l'onn proxim in tema ed era la dumonda co che la Lia va enturn cun la diaspora. Lura èsi da chattar respostas sin la mobilitad e la digitalisaziun.» Capeder abitescha a Gams ed è là mainafatschenta da la Konsumgenossenschaft Gams.

Donat Nay per la SR

Per la Surselva Romantscha (SR) stat Donat Nay a disposiziun per in'ulteriura perioda d'uffizi. Sia motivaziun saja da star en per ils interess da la lingua rumantscha, di Nay. Sin la dumonda tge che la suprastanza haja cuntanschì ils ultims onns conceda el ch'ì na saja forza betg reussi da midar la structura da la Lia Rumantscha, ma i saja persuenter gartegia da mitigiar in pau las relaziuns tranter ils adherents dal rumantsch grischun e dals idioms. Gist quai saja era stà ina da sias finamiras cura ch'el haja cumenzà sia lavur en suprastanza. «Ins sa stenta da far punts», di Nay.

Sco sfidas per la proxima perioda d'uffizi enumerescha el ils medems puncts sco Capeder ed el agiunta: Co ch'ì giava vinavant cun la gasetta quotidiana saja central e fitg impurtant. Plinavant spera Nay che la festa da 100 onns reunessia ils moviments rumantschs e dettia in bun anim – betg il davos era per posiziunar bain la Rumantschia.

Duas demissiuns en la cumissiun da gestiun

Eleger ston ils delegads era successurs per *Doris Casty* e *Paul Solèr* da la cumissiun da gestiun che dattan lur demissiun. *Seraïna Sturm* resta vinavant en la cumissiun da gestiun e per ils posts vacants candideschan *Sascha Janutim* e *Retus Giger*.